

Herremättli Clique

Dr Muba- Glaiholz-Plausch

Hesch dä Plausch dert hinde gseh
Wo sunscht d'Rennfahrer flitze?
Siebetausig oder meh
Kemme go kibitze.
Lut Reklame in dr Zytig
Sell's e Schpalter-Wettschtryt ha
Siebetausig — am-ne Frytig
Luege sich die Hagger a.
:Dr Megge sait zue syner Frau
Kumm nimm Dy Gäld, do gömer au.

Wär isch uff die Idee nur ko
Fir so-ne Meeting z'mache?
Siebetausig zahle z'loh
Und sich ins Fyschtli z'lache?
Zwei Ma sin nur im Komitee
Gerisse wie zwei Schtrohmer
D'Erfinder vom Kamille-Tee
Zwei Schpezereie-Kromer.
:Dä Benefice — e glatti Summe
Zahlt — vo siebetausig Dumme.

D'Holzhagger-Knächte trätte shtolz
Ins Rampeliecht zem Schart,
Näbe sich e Huffe Holz
Ein het e schwarze Bart.
Dä nämlig wo zerscht fertig isch
Mit ern Glaiholz mache,
Griegt dä Bächer uff em Disch
S'Bublikum tuet lache.
:S'Bethli sait, he Gottfried Steggli
I glaub dä machts, dä mit de Leggli.

Dä mit em Bart, ganz unuffellig
Haggt greftig wie-ne Knächt,
Wo macht e ganze Schter uff Bschtellig
D'Schpeen fliege gar nit schlächt.
Dehei macht är au Holz in Rueh
So zobe nach em graase,
Doch gweenlig luegt em niemer zue
Hit aber siebetausig Nase.
:D'Meiere duet dr Alt jetz pagge
Vo däm kennsch lehre richtig hagge.

D'Lyt hän gschraue, glatscht und gschpunne
Wo-n är dr letschti Glotz nimmt dra.
Grad als hätt dr Ferdi gwunne
Git's e Gschyss jetz um dä Ma.
Dä schloot druff dass es Fungge git
E-n Aendschpurt haut är ane
Als erschte isch är fertig mit,
E Siech isch's, nundefahne!
:Dr letschti Schlag und no-ne Kygg
Wie synerzyt dr Arnold Schygg.

Dr Sieger fahrt e-n Ehrerunde
Dä mit em Bart, s'isch klar.
D'Fraue hän-en härzig gfunde
So Mögge sin hit rar.
Was macht me jetz mit däne Schyttli
Wo dä so scheen het g'schpalte?
Frogt ihre Britigam do s'Grittli
Darf är das Holz ächt bhalte?
:Nai, nur s'Komitee, die zwei
Nämme alles mit sich hei.

Däne zwei vom Komitee
Sin keini Blootere kracht.
Ohni dass e Hand tuet weh,
Hän si dr Pulver gmacht.
Die sin natirlich zähmol häller,
Als siebetausig bravi Lyt
Si hän jetz gschpalte Holz im Käller
Und hän elei dr ganz Profit.
:Wenn's eine nonig gschpanne hätt:
S'Volgg het vor em Kopf e Brätt.

Gang am Zyschtig in d'Baslerhalle an
d'Ladärne-Usstellig. Si isch Offe vo de morgene-
am nyne bis z'nacht am elfi.
